

卷之九 貞

人民部

藝文志

叙跋類

碑銘

贊頌

詞詩

文安縣志

十册

文安縣志卷之九 貞

人民部

藝文志

胡氏族譜叙

朱 熹

自宗子法廢而族無統唐人重世族故譜牒家有之唐以後不能然苟非世之富貴多文儒族派系往往湮淪而莫考矣胡氏之先自周武王封舜後胡公滿於陳子孫以謚爲姓歷漢文恭廣公以迄關內侯質公爲立譜之鼻祖相傳廿五世中間序昭穆別疏戚因流遡源由本達枝作譜以傳庶幾不忘本也胡氏子孫繼此能自振於時則斯譜之傳愈久愈光由一世以及千萬世莫可量也

右邑人貢士胡一敬先世族譜序也歷漢晉宋元迄今相傳三十五世昭穆詳載譜中如勅文定胡國安端明殿學士公胡世將等綸音並先

賢虞允文洪适文天祥等贊叙輯爲譜牒洵希世之珍不獨胡氏之家
乘光也篇帙甚煩不能盡載僅錄其一以志景行云

胡氏族譜跋

文天祥

世以譜傳而不能以像傳能並以傳者必先人勲業著於當時道德鳴於
斯世乃能留其像歟凡模容雖盛不久者以無譜之故也胡氏譜像燦然
可傳千百世而不朽子孫瞻先人之像讀先人之譜而不興起仰止之心
者未之有也

文昌募言

韓文

人之思敬而樂善也拜漢壽亭侯之廟無論直與不直皆欲倚法護而邀
福瞻梓潼帝君之範無論慧與不慧皆圖假藻譽而乞靈若夫一龕之香
火爲化身之所不及知滿世之塵囂爲寶書之所不能訓每歎屈子之沉
冤馮君之長樂斯固帝意之無如何而天心之不可問者也邑有祠居泮

壁之左舊隣魁閣今傍荒臺宇寄星霜墻迷風雨士大夫之裔過而罔不悲且恫焉疏言爲募徧告同人凡有不慳於施舍而欲嗣續聲華之傳者無靳分毫之助

王孝子叙

朱之俊

文安王孝子其行奇其志苦古今指不一二屈詳載本甯卓吾諸傳中行世近百年其六世孫景祚以舊刻漶缺謀新之徵叙於余余惟先王肇脩人紀首極君親然必曰有父子而後有君臣則孝也者三才恃以維世代恃以嬪迄於叔季綱淪法斁而分羹創業棄親立名之說起謬儒猶或蹉之間有履常處順奉養不違者則羣然以孝歸焉至天性肫篤偶當親厄類能憤發見畸或身蔽鋒刃或上書代死或剖股割肝激於一時其流風遺蹟猶使後人歎慕咏歌於無已夫彼亦不幸而遭非常乃世遂以爲不可及其初念豈至此哉記曰小孝用力中孝用勞大孝不匱不匱者何忘

其身之謂也故孝之至者不知有身夫使知我有身爲親用而孝已減矣王孝子別父襁褓時有何知識乃索父二十年之後跋險阻歷寒燠十餘年卒得父與俱歸方其辭母曰人而無父何以爲人卽不得父不歸矣其念決而詞愴固已視身非已有唯父是徇矣以故通感於鬼神兆形於夢寐以二十年睽絕未謀面之親一朝不緣而合嗚呼斯豈人力能然哉始知天憫孝子之志乃必候其奔驚十餘年而後合之者蓋以久暫覘其安勉也勿論履常處順奉養不違者難與比艱絜峻卽憤發見畸激於一時者豈可同年語耶善乎斗中真人之言曰孝至於天日月爲之明孝至於地萬物爲之生孝至於人王道爲之成則凡裁殺凶札干戈萃梏之不息皆不孝之氣釀而致之豈盡造化運數之故乎夫維三才嬗世代一孝裕如則燕及皇天克昌厥後事之已然者耳茲其孫率祖攸行復表章之俾寓目者如成人服子羔之衰施家滴嚴公之淚移孝作忠大匡人紀忘其

身爲天下用庶幾推先人流風以淑來者所謂勿替引之聿追來孝其在斯人歟

邑侯唐事宜叙

王策

嘗觀宋有衙前之役小民至蕩產傾家不能供或自經避匿以冀免當事者議募役代之民間始獲休息今文邑大戶之害奚啻衙前而種種弊竇誠有如侯條議所云者前此亦議剗除旋更旋已此蘇綽所爲致嘆於張弓也邑侯唐公目擊其害爲之惄然曰以一邑徵解供億之煩取辦於六十餘家而又益以耗蠹多端不幾魚肉此民乎於是易以均徭之法而一切收支解役盡隸於官猶慮薙芟不自其本後且滋蔓凡冗濫浸漁之弊悉爲杜絕邑久苦急弦一旦弛之使閭閻有安生樂業之風無挈家避匿之苦是侯之大有造於文邑也侯才犀利當逆璫困抑之後嘗自言曰此身皆聖明之賜苟有裨於國家曾何愛於髮膚故其爲之興除者不遺餘

力昔鄴有鑿渠之利長吏欲易之父老爭曰此西門君所爲賢君法式不可更也今侯所興除詎止一渠之利文人沐侯之德當必如鄴父老不敢忘嘉惠也

贈唐二華父母叙

紀克揚

唐公之令文安蓋奉天子詔也凡令皆由銓授公以壬戌甲第任高陽爲逆璫所中已而三狐就獲來復有慶天子始起公補令心特器重之將大授先使臥理爲慰耳公之言曰幸逢聖主當陽解網復職君恩難報雖化異物而頂踵之竭匪石可轉嗟乎丈夫致身朝廷而遭坎坷其不磨耗壯志者幾希乃公固豪俠人益復動心忍性黽勉服官民隱是急日覩大戶頭役之害力爲裁革一切收解募費斟酌平鋪下不病民上不廢事至畫一也修葺學宮楹桷煥然每朔望伏謁畢卽升堂列坐生徒環向問業爲之指陳經義旁通曲証剖誠意之關抉慎獨之秘金聲玉振叩端無倦色

謂四民各執一業農人勤於耨耕工人惕於操作賈人勞於販易獨士最逸晤言一室有詩書可攻有子弟可教何憚而不爲此且旣服其服誦其言曾亦行其行乎諸生成嘖嘖歎以爲數十年來所僅聞見者縣故無志公曰是亦文獻之邦也何無徵若是因訪舊家詢遺事條列成卷士紳悅之各捐資助刊公曰此有土者之責也何至重煩父老爲遂謝却之邑本汗下以堤爲命頻歲多旱即陂塘可布種公不以未雨可弛綢繆親巡堤上周視衝要考核河渠遙堤之說因他邑犬牙相制或爲掣肘特苦志焦思力爲區畫調停刻曰可底績而內召用之命頒給矣大要公之行事惟務其大者遠者不瑣瑣細故善乎其言曰革弊不難於盡而在酌其可行立法不難於始而難於終之無弊也夫國之大事莫過於兵故人有敵手足應之國有敵甲兵應之今天子命公主兵事則手足視公也其兆之以文安者所以養其精蓄其銳而不知公之芒刃不頓也即於其治文安見

卷之六

源泰印字館印

之矣公將行其尉任子屬余言爲贈爲述其行事及其論說如此余因而次之

邢紫淵孝行叙

陳協

今上御極十有七載海內翔洽詔舉山林孝友士量能授官倣古事君資於事父之義畿內有司以諸生邢公紫淵孝行狀上監司及臺使者首列薦剡以聞蒙賜棹楔旌里廬此曠典也宗黨謀具扈酒爲賀因問叙於余余職司風憲何得以譽言進請質言之公先鄭人代有名公自大中丞計部郎兩公後先俱丁丑成進士遂爲文安世族是爲公祖公父文學先生四子公行三有至性艸角善綴文舞象補博士弟子員輒冠曹偶才名翳奕弟子北面問字者屢滿戶公藉舌佃以供尊人甘旨文學先生爲開顏加一七會苦病公侍疾滌衣浣裾無倦容及易簀公拮据襄事居廬臥塊準禮家言雞骨支牀弗恤也行營善地不惜罄產安厝費且鉅侍老母母

輒相依曰老人非偏嗜但覺兒夫婦知我痛癢耳公授經孝義鄉母城居偶恙輒怵怵心動遄歸欠身榻旁揣色聽聲疾爲差飲食衍衍者十餘年會兵變負母避水鄉即濁淖污泥中經日不食罔辭勞瘁已而棄柁楫公墨瘠焦枯幾類死者歲時饋奠猶作孺子啼篤愛典墳有黃甫士安癖每念先世積書萬軸多散佚乃自六籍百家以及醫藥卜算山劉碑篆之屬皆抄纂標序細加丹鉛揮汗呵冰樂此不爲疲也當事者念公久困學宮會有德行文學拔入國子監趨公稅駕公笑曰老蠹乾螢儒者事也遑問其他余嘗讀邑志載公高祖事繼母李氏又遠祖兄弟事母傅氏俱以孝聞公家何世多純德耶曾哲之後有曾參曾參之後有曾元嗚呼是可以風矣

張明府編審持平叙

王 埏

周官大司徒掌稽國中及四郊都鄙之戶口丁壯貧賤老幼廢疾以歲時

入其數而行徵令大約身軀數尺徵之以其才年偪六旬舍之以其齒故當其時司民協孤終司商協名姓司寇協奸牧協職工協革場協入廩協出而民之少多死生出入往來者皆可知也迨至漢有算賦口錢之增隋有福手殆足之喻歷代相沿弊端滋起唯唐之兩稅明之均徭尙存其意而宋之僱役諸法又不足道也我國家幅員日廣戶口益繁五載一行編審式重版圖而勤恤民隱端有賴於循良之牧矣明府張侯之蒞敝邑已經七稔數年以來沐浴膏澤而躋臻仁壽紀黃門高太史俱有頌詞以掄揚其盛茲值首夏侍菴孝廉諸人致書於余曰吾邑賢侯之編審古今所未有也萬姓歡呼是不可不一贈述其事文安蕞爾小邑而丁額八千有奇里有三十三區其間豪強之詭避奸胥之欺隱伶仃之莫訴積習既久難以猝變公奉憲檄則指天矢日務期上不虧賦額下不失民情於損益之中而寓均平之法意誠善也往例屆期各里民裹糧至縣動涉旬月輒

不得歸公曰何用重困吾子姓爲哉爲之先示致期某日審某里某甲循序以進既可朝發而夕至亦晨往而暮來隻日則坐廳事理訟獄雙日則對城隍閱戶口及其按籍點名不無狡黠者朦混希脫公於去年賑饑時曾親履村落取有十家連名冊凡一經見面既識其貌並記其名遇有此等情弊直詰之曰某某輩不當入冊耶亭長鄉耆無不相顧愕然咸嘖嘖歎服公之神明也數日之外一再詢詰民不敢欺無復隱諱於逃亡者莫不悉除而少壯者允宜增入豈非上不虧課下不病民有以愜公之本志歟凡經審過須待彙齊造冊公慮胥吏有以措勒需索次晨卽出榜示坦然可觀又勝芳石溝等里分僻處水鄉離城窻遠公念窮黎跋涉之勞旅食之苦遂冒暑行部親至本地一了結之田間之黃童白叟靡不感激泣下經兩閱月而報竣自始迄終民間不煩一錢之費不誤一日之工眞所謂行所無事矣昔召康公於樹下斷獄後人追美至稱之曰甘棠召伯矧

茲汪洋千頃之陂菌萑芙蓉之水不憚親勞玉趾徜徉而周覽焉渡連筏而接濟又何難與蔽芾甘棠之章同歌而接濟乎余自蜀內擢部郎時奉公之顏色服其丰姿朗潤則以爲河陽之潘岳通才敏決則以爲淩儀之陸雲今乃仁化滂流則又以爲桐鄉之朱邑矣會見疏名黻座超擢清華天子倘覽賦役之書進大司農而商之曰今吏治有行如卓茂而政如劉昆者乎非君侯其孰當之是爲叙

宰文略自叙

張朝琮

丙寅夏四月予筮仕得文安令入其境見土地荒蕪人民凋敝井里蕭條城垣傾圯亟呼父老而問之爭相告曰文安澤國也地形如釜九河下流以苑家口一河匯巨浸者七十萬派飛流而轉注於容刀之渡秋霖泛漲陸地成湖其不爲魚鱉者幾希況乎水患之後徭役紛繁陋例相仍民不堪命起瘡痍而登衽席端有望於我侯矣予聞之心爲惻然因思國家以

邑之休戚民之痼瘼寄於令一人饑我饑之也一人溺我溺之也勿爲安其廬鼓其腹祛其弊而使惟怨惟咨流離失所者是誰之過歟是以不避嫌怨不憚勞苦利必興害必去廢必葺殫心畢慮竭力敷陳以求無忝厥職幸諸上憲神明精察凡有所請罔不應如桴鼓遂覺年來士誦於家農耕於野賈安於市行旅出於途而絃歌擊壤之風已見於堯天舜日之下癸酉夏五月蒙撫憲題調臨洵文之民不予舍走上谷籲留者二百餘人赴河干泣送者又幾千人民其有良予益滋愧今蒞臨洵未三月而恭逢翠華東幸召對移時未六月而疊遇殊恩特陞薊郡么膺下吏受寵逾涯不知何以仰報聖恩於萬一茲以受代之暇稍取菑莢數則輯而授梓正之大人先生蓋見予之心文民能諒之而文之民予亦不能忘之也若謂文民不負予予亦不負文民則吾豈敢

送式玉張明府移任三河叙

陳儀

歲癸酉五月巡撫直隸郭疏稱文安縣令才最首八郡三河員跣應補謹按選員無如張允請調授之制曰可於是邑之父老黔首星奔雲集赴上谷者數十百人號請兩道弗許會撫軍路經文邑顚留益衆撫軍溫詞慰而遣之秋八月張侯治裝就道邑民追而送之河之潞填衢溢路偃僂雜沓繫其舟而流涕焉號呼之聲聞數里侯乃淒然泣下而慰之曰子何以及爾父子予心缺然予到縣以歲之丙寅歷今將八載奉委他出者數矣其所得撫摩爾者僅矣丙寅之明年委署章武並攝其學博越戊辰二月阿陵需員往署之是秋八月益津缺刺史往治之歲在辛未予再有阿陵之役今年涿鹿之行越月而歸歸則三邑之命相促矣其餘勘獄走差不百而足計一歲之間得撫摩爾者纔三之一八歲之間得撫摩爾者纔十之三惟爾饑予弗遑哺惟爾寒弗予遑煦予自視欲然予何德之與有於是邑之民雜然而前曰此正吾曹之所以悲且怨也民各有牧衆各有母

吾邑之貧且陋最矣乾溢之餘嗣以鞭朴差科之下甚於饑寒歲以百餘未之有療昊天不棄以侯賜民用拯其溺用滌其焚民乃獲蘇夫水火之災計歲以百拯滌之恩年僅而八以八年勞瘁不遑之父母撫百年水火日甚之災黎而章武益津阿陵涿鹿之民從而奪其半大差巨獄又從而奪其半三河復從而奪之予又何辜儀乃起而慰之曰不然侯之才遠矣其遇合也屢矣戊辰之冬三道會薦異等向非京兆奏罷則去此已五年矣庚午之夏撫身於公特疏保舉是年秋保疏再上向微銓部駁議則去此已三年矣辛未十一月三道再薦異等向非限於人額則去此已二年矣尙待如今而始有三邑之命哉故八年於茲天所以屈侯之久者乃所以蘇民之深也而又何尤乎父老聞知流涕再拜舟乃得解去民遂請其衣冠而歸葆祠之是時八月四日也

楊明府編審持平叙

王 埏